

Тишларингиздан бири оғриганда...



14:00 / 18.02.2023 3446

Тишингиз қаттиқ оғриб, даволашга ҳам имкон бўлмаганда, оғриқнинг зўридан сизнинг ягона ташвишингиз, уни олдириб ташлаш бўлиб қолади. Уни олдириб ташланганингиздан сўнг беихтиёр тилингиз тишдан қолган милкдаги бўшлиқ томон чўзилаверади. Бунинг аниқроқ маъноси шуки, тишингиз ўзидан бир бўшлиқ қолдиради ва сиз ўша тишингизни соғина бошлайсиз.

Кўпинча бу бўшлиққа кўникишингиз учун узоқ вақт керак бўлади, лекин сиз бунга кўникасиз. Ўзингиздан сўранг: «Уни олдириб ташлашингиз керакмиди?»

Бу саволга сиз бундай жавоб берасиз: «Ҳа, чунки бу тиш менинг оғриқ ва аламимга сабаб бўлаётган эди».

Ҳаётимизда шундай вазиятлар бўладики, баъзи одамларни ташлаб кетишга, улардан узоқроқда бўлишга мажбур қилади. Бир вақтлар шу инсонлар бизнинг саодату қувончимизга сабабчилардан бўлган бўлсалар, энди мазкур вазиятлар уларсиз ҳам ҳаётимизни давом эттиришга ундайди. Тан олиш керакки, ўша инсонлар ҳаётимизда бўшлиқ қолдирадилар! Энди мана шу бўшлиқ оғриқ ва алам бермаса бўлди.

Азизлар, мусулмон шахс вазият қандай бўлишидан қатъий назар ўз диндошини қийин вазиятларда ташлаб кетмайди, унга озор бермайди, унинг қилган яхшиликларини унутмайди, имкон қадар унга ёрдам беришга, муаммоларини бартараф этишга кўмаклашади.

Абдуллоҳ ибн Умар розияллоҳу анҳумодан ривоят қилинади:

«Расулуллоҳ соллаллоҳу алайҳи васаллам: «Мусулмон мусулмоннинг биродаридир. У унга зулм ҳам қилмайди ва ташлаб ҳам қўймайди. Ким ўз биродарининг ҳожатини чиқарса, Аллоҳ унинг ҳожатини чиқаради. Ким бир мусулмонни ғамдан фориғ қилса, Аллоҳ ундан Қиёмат кунининг ғамларидан бир ғамни фориғ қилади. Ким мусулмоннинг айбини беркитса, Аллоҳ Қиёмат куни унинг айбини беркитади», дедилар».

Бухорий ва Муслим ривоят қилишган.

Аллоҳ таоло барчамизни ҳадисда айтилганидек, комил мусулмонлардан бўлишимизни насиб этсин!

Нозимжон Ҳошимжон & Хуршид Маъруф тайёрлади